




**Magna Gloria Antiquæ & Novissimæ Domus
Schwarzacensis A Magno Sacerdotio Sive Vita & Res
Præclare Gestæ ... DD. Abbatum Celeberrimi &
Antiquissimi Monasterii O. S. B. in Münster-Schwartzach**

Friedrich Karl <Bamberg, Bischof>

Wirceburgi, 1743

Sæculum IV. Ab Anno Christi 1115. usque ad annum 1215. complectitur
Abbatas). Bopponem, Wolframum, Theodoricum, Gumpertum,
Sigenhardum, Gotswinum, Tragobertum, Gottfridum, Dietrimum.

[urn:nbn:de:hbz:466:1-64362](https://nbn-resolving.org/urn:nbn:de:hbz:466:1-64362)



genua abjicit, calentibus votis linguæ usum à Deo precatus; &, ecce tibi! carnis frustulum ex ore egerit, surgit, Magnalia Dei loquitur, præsentibus queisque audientibusque admiratione tanti miraculi defixis. Rupertus Abbas exactis cum laude 22. annis, ex quo in Abbatem creatus fuerat, migravit ad Dominum.

SÆCULUM IV.

*Ab Anno Christi 1115. usque ad annum 1215.
complectitur Abbates 9.*

Bopponem, Wolfframum, Theodoricum, Gumpertum, Sigenhardum, Gotswinum, Tragobertum, Gottfridum, Dietrimum.

BOPPO ABBAS XIV.

Abbatum Sæculi hujus 4^{ti} primus Boppo electus est anno 1135. Vir præstantissimis à natura ipsa ad gubernandum dotibus ità instructus; ut gravissimum sibi vulnus Abbatia inflatum fuisse senserit, dum eo adhuc anno morte præmaturâ illum extinctum esse vidit.

WOLFF-

WOLFFRAMUS ABBAS XV.

Annus 1136. Wolfframum ex Monasterio Hirsaugiensi postulatum, nobis præfecit, idémque Calendis Aprilis Wolfframum nobis eripuit: Vix ortum illum Abbatia suspexit, jam mortuum deploravit; communi id temporis fato, quo pestifera lues Germaniam propè universam depascebatur.

THEODORICUS ABBAS XVI.


Aliquantò diutiùs annis scilicet 5. Abbatiali dignitate Theodoricus conspicuus fuit; postquam hæc illi anno Domini 1137. communibus suffragiis collata fuerat: sed nihil ferè de illo memoriæ proditum habemus.

GUMPERTUS ABBAS XVII.

Electus anno 1142. septem annorum spatio cursum suum consummavit, idibus Maji anno 1149. ad Cœlestem Patriam evocatus, ibidem bene gestorum mercedem recepturus.

SIGENHARDUS ABBAS XVIII.

Ex quo Sigenhardus hujus dignitatis fastigium conscenderat, anno scilicet 1149. totus in



eo fuit, ut pristinum Monasterio & Ecclesiæ splendorem redderet: Eum in finem templum, quod ruinam minabatur, reparavit, Sacellum etiam D. Joannis honoribus supra Monasterii valvas exstruxit, ratus nihil ad officii sui partes ita pertinere, quam ædes Deo sacras vel à ruina vindicare, vel magis magisque exornare. Ad laudabile hoc studium instaurandæ Ecclesiæ accedebat grata quædam erga conditorum Benefactorumque nostrorum cineres pietas, & pia gratitudo, quæ Sigehardi animum eò induxit, ut in medio templi Sarcophagum lapideum excitari curaret, qui Meingaudi Comitis Fundatoris primi, & Ymæ Conjugis, Erlungi Episcopi Herbipolensis, Eggeberti & Burckardi Abbatum ossa custodiret; ad quorum societatem, ut piè confidimus, & ipse in Cœlesti Patria pervenit anno 1165. piè defunctus.

GOTSWINUS ABBAS XIX.

Anno Domini 1165. creatus Abbas Gotswinus fuit, Antecessori suo zelo Religionis quàm simillimus: Templi enim nostri splendorem augere variis modis studuit; duo præcipuè altaria,
alte-


alterum in D. Magdalenæ, in S. Agapiti Martyris honorem alterum excitando: Quæ altaria cæteraque zeli illius monumenta licet hodie destructa sint; optimi tamen Præfulis memoria nostris nunquam in animis oblitterabitur. Monasterium curæ suæ commissum habuit annis 14.; quibus elapsis piè in Domino obiit, anno 1179.

TRAGOBERTUS ABBAS XX.

Magnam de se expectationem concitaverat Tragobertus, dum Monasterii nostri Abbas anno 1179. renunciatus est: & quidni à Viro præclaris queiscunque dotibus ornato optima quæque sperare jure potuimus? At ecce! non tam datus nobis Tragobertus, quàm ostensus fuisse visus est; anno quippe suscepti regiminis altero obiit.

GOTTFRIDUS ABBAS XXI.

Secutus Tragobertum proximè fuit Gottfridus anno 1181., qui demandatam sibi gubernandi Monasterii provinciam annis duobus supra viginti laudabiliter administravit: decimam in
Ost.



Ostheim Monasterio nostro rursus adjunxit, magnam pecuniæ vim jure hæreditario ad se pertinentem nobis dono dedit; quid? quòd etiam ipsius germana soror in Ecclesiam nostram admodum munifica fuerit; ut non abs re Gottfridum Abbatibus de Monasterio nostro optimè meritis accenseamus.

DIETRIMUS ABBAS XXII.

Abbatum sæculi hujus seriem claudit Dietrimus anno 1213. Monasterio cum imperio impositus; quo Abbate licèt prospera Monasterio nostro tempora fluerent, funestis tamen Franconia fati jactabatur, quippe in quæ incidit Conradi Episcopi Herbipolensis tristissima cædes ab amicis propriis illata; cujus monumentum hodiedum extat in urbe Wirceburgensi excitata ad Summam Ædem columna eo ipso in loco, ubi patratum facinus fuit. Dietrimus extinctus est anno Domini 1220.

